

**Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisissaattut siunnersuut****Saqqummiussissut**

(Aningaasaqarnermut Nunamullu Namminermut Naalakkersuisoq)

**Siullermeerneqarnera**

Aningaasarsianit akileraarutit pillugit Inatsisartut inatsisaata allannguutissaatut siunnersuut Naalakkersuisut sinnerlugit matumuuna saqqummiutissavara.

Siunnersuuteqarnermi akileraartarnermi inatsisit pingasunik pingaarutilinnik allanngortinniarneqarput.

Siullermik Naalakkersuisooqatigiit naalakkersuisooqatigiinnissamik isumaqatigiissutaanni immikkoortoq, pigisanik aalaakkaasunik pisinermi taarsigassarsiat erniaasa tamakkiisumik ilanngaatigineqaaqqittalernissaannut tunngasoq atuutsinneqalissaaq. Namminerisamik illuuteqarnermut taarsigassarsiat erniaannik ilanngaatiginnissinnaanerup killiliiffigineqarsimanerata Naalakkersuisut siuliinit atuutilersinneqartup kingunissai Naalakkersuisooqatigiit ernummatigilluinnarpaat. Eqqaamasariaqarpoq inuit nammineerlutik ernianut akiliutigisartagaasa ilarpassui illuuteqarnermut attuumassuteqarmata. Namminerisamik illuuteqarnerup patajaatsuinissaa kissaatigigaanni, tamannalu naalakkersuisooqatigiit kissaatigaat, akileraartarneq pillugu politikkip anguniakkamut tassunga akimmisaarutaannginnissaa pingaartuuvoq.

Siunnersuummi allannguutit aapparaat aaqqissuussinermik ”carry back”-imik taagorneqartumik atorunnaarsitsineq. Aaqqissuussineq taanna akileraartarneq eqqunneqarmalli attuuppoq, ukiunilu kingullerni aningaasaqarniarnerup ilungersunarnerujartuinnarnerani eqqumaffigineqariartuinnarsimalluni. Aaqqissuussineq pisortat karsiinik annertuumik navianartorsiortitsisinaavoq, ukiunilu aggersuni nunami maani suliffissuarnik, sungiusimasatsinnit anginerusunik pilersititsisinnaanerit ajornartorsiulersinnaaneq annertunerulersissavaat.

Allannguutip kingulliup siunertaraa akileraarutininik A-nik akiliisarnermi periutsit pisariillisarneqarnissaat pitsanngorsarnissaallu. Tamanna akileraarutit A-t unerartinneqartut akilerneqarnissaannut piffissarititap ullut qulit missaannik kinguartinneqatigut pissaaq. Tamanna sulisitsisut akiliiffissanik nassiussiffigineqarnissaannik periarfissaqartitsilissaaq. Maanna suleriaatsit pisariusut tassuunakkut allanik pisariinnerusunik taarserneqarsinnaassapput, tamannalu kukkusinnaanerup millisinneqarnissaanik ilaatigut kinguneqassaaq.

Naggataatigut, inatsisissatut siunnersuut tassungalu oqaaseqaatit innersuussutigissavakka.

Taamatut oqaaseqarlunga inatsisissatut siunnersuut Naalakkersuisut sinnerlugit Inatsisartunut suliassanngortippara, aammalu Aningaasaqarnermut Akileraartarnermullu ataatsimiititaliamit sularineqareerpat aappassaaniigassanngortillugu.